

Epetoidi

inänite Pabodo nänö cadota ante yewæmongainta

Waa quëwencæminimpa, ante

1 ¹Wængonguï angä ëñëninque Itota Codito botö imote da godongä gogaïmo inte botö Pabodobo inömö inte yewæmömopa. Epeto inömö quëwëmini incæ mïnitö Wængonguï quïmïni inte Itota Codito nempo quëwëninque në ædæmö cæte pönëmïni inöminite botö, Mïnitö acæminimpa, ante yewæmömopa. ²Mönö Mæmpo Wængonguï tönö mönö Awënë Itota Codito piyænë cæte waadete pönö cæda ate mïnitö gänë pönëninque waa quëwencæminimpa, ante yewæmömopa.

**Codito nempo quëwëninque
mönö eyepæ ëwocamompa**

³Mönö Awënë Itota Codito Wæmpocä inongante Itota inömö adocä ingantedö ante, Botö Wængonguï inongä ingampa, ante apænægacäimpa. Inique mönö inömö Codito tönö do öönædë æite bai tömengä nempo quëwëñömonte adocä Itota Wængonguï incæ tæiyæ waëmoncoo në ëwocagaingä inte pönö cæcä æninque mönö tömengä nänö ëwocadoncoo tömancoo bai adobai eyepæ pönï ænte ëwocamompa. Mänömaï cæcä adinque mönö tömengä ingante apænedinque, Bitö waa pönï cæbi æmönipa, ante watapæ apænecäimpa. ⁴Tömengä inömö edæ, Codito nempo quëwëninque mïnitö botö ayömo edæ tæiyæ waëmö ëwocamïni inte edæ wentamö mongænämaï incæminimpa, ante tömengä inguipoga nänö badönämaï inedë incæ mönö

imonte pönö apænte ængacäimpa. Ayæ mönö imonte waadete pönëninque tömengä, ⁵Botö pæpogate bai æmo beyænque mïnitö inömö Itota Codito nempo quëwëninque botö wëmïni baquïmïni incæminimpa, ante cædinque tocæboimpa, angacäimpa. Inique tömengä doyedë nänö angainö bai cædinque pönö angä ate mönö Wængonguï wëmö cöwë baquënëmö ingamöimpa.

⁶Edæ nanguï waadete pönö cædinque tömengä nänö në Waadecä ingante da pönongä æmompä. Mänömaï beyæ mönö inömö tömengä ingante, Bitö nää apæite bai ëmönömi inte mänömaï waadete pönö cæbi æmönipa, ante watapæ apænecäimpa. ⁷Edæ tömengä nänö në Waadecä inömö mönö imonte æncæte ante nämä wepæ godonte ængä beyænque mönö abæ tawænte quëwëmompa. Ayæ adobai tömengä wepæ inte nää mënongacä beyænque ëñënämaï mönö cædö ante Wængonguï nanguï waadete pönö cædinque inimpö cæcä quëwëmöimpa. ⁸Tömengä inömö edæ, Æbänö i, ante tömänö ante në ëñënogä inte, Æbänö cæquïi, ante edæ nöingä ëñëninque mönö beyæ ante godömenque nanguï pönö cæcä æmöimpa. ⁹Ayæ edæ, Codito tönö guëa cædinque nämä botö änö bai cæte tocæboimpa, ante Wængonguï angacäimpa. Tömengä mänömainö ante nänö wëmö inömö angainö ante mönitö imönite nïwo edonque pönï odömonte

apænecä ēñēmōnīpa. ¹⁰Tōmengä, Īñedē cæcæboīmpa, ānīnque tōmengä nānō angaiñedē iīnque ba ate tōmengä nānō angaiñō bai edæ iīnque cæcæcāīmpa. Edæ öönädē ongoncoo tōnō inguipoga ongoncoo tōmancoo tē gæte māmō adocanque nempo Codito Awēnē nempo godōmo æncæcāīmpa, ante cæcampa.

¹¹Nāmā pōnente nānō angaiñō bai tōmānō ante adobaī pōnī nē cædongä inte Wængonguī, Īīmaī cæcæboīmpa, ante pōnente ate cōwē cæcampa. Īnīnque tōmengä, Codito nempo quēwēnāni inānite æncæboīmpa, ante nānō pōnente angaiñō bai cædinque, Minitō Codito nempo quēwēnguīmīni incæmīnīmpa, ante pōnēnīnque mōnitō ĩmōnite apænte ængacāīmpa. ¹²Mōnitō, Codito beyæ watapæ bacæīmpa, ante tāno pōnēmōni ĩñōmōnite tōmengä, Botō ñāō ěmōnō ante watapæ apænemīni bacæmīnīmpa, ante mōnitō ĩmōnite pōnō apænte ængacāīmpa.

¹³Ayæ, Codito pōnō ængä beyænque mīnitō quēwēncæmīnīmpa, ante Wængonguī watapæ nānō apænegañō ante ēñente pōnēnīnque mīnitō epeteomīni adobaī Codito nempo quēwēmīni ĩmīnīpa. Wede pōnēmīni adīnque Wængonguī, Botō wēmīni ĩmīnīpa, ante edonque acæīmpa, ante odōmoncæte ante tōmengä ěmōwo ante mīnitonga yewæmonte bai cædinque tōmengä Tæiyæ Waēmō Öñōwoca ingante da pōnongä ænte ěwocamīnīpa. ¹⁴Edæ Wængonguī, Botō quīmīni ĩnōmīni inte mīnitō abæ tawænte mīni goyedē mīnitō ænguīncoo māñīñedē ate eyepæ pōnī æncæmīnīmpa, angampa. Ānīnque tōmengä, Nō pōnī ĩmpa, ante ēñencæmīnīmpa, ante cædinque tōmengä Öñōwoca ingante ñōwo da pōnongä ænte ěwocamōmpa. Īnīnque pancacooga do ænte bai ěwocamō inte mōnō, Īñcayæ ate mōnō tōmancoo ænguīnque ĩmpa, ante edonque ēñengæīmpa. Tōmengä māñōmaī cæcä adīnque mōnō, Wængonguī bitō godōmenque ñāō apāite bai bitō ěmonguīnque māñōmaī cæbīpa, ante watapæ apænecæīmpa.

**Nō ēñēnāni bacædānīmpa,
ante Pabodo apænecampa**

¹⁵Botō ĩñōmō, Epeteoidi mōnō Awēnē Itota ingante wede pōnēnāni ĩnānīpa, ante tededāni ēñentabopa. Ayæ adobaī, Wængonguī quīnāni tōmānāni ĩnānite epeteoidi ĩñōmō waadete pōnēnāni ĩnānīpa, ante ēñēnīmo inte, ¹⁶botō ñīmpo cædāmaī inte Wængonguī ingante cōwē waa ate pōnēnīnque apænebopa. Ayæ mīnitō beyæ ante cōwē apænebopa. ¹⁷Itota Codito mōnō Awēnē ĩñongante Wængonguī ĩñōmō adocā Codito Wængonguī ĩnongä ingampa. Ayæ nē Mæmpocā ĩnongä inte tōmengä ñāō ěmōnongä ingampa. Tōmengä ingante apænēdīnque botō, Bitō Öñōwoca ingante da pōnōmi ænīnque epeteoidi ĩñōmō nē ēñēnāni bacædānīmpa, ante apænebopa. Ayæ, Bitō Öñōwoca pōnō odōmongä adīnque epeteoidi wæætē Itota Codito ingante do ate bai ædæmō pōnencædānīmpa, ante botō mīnitō beyæ ante Wængonguī ingante cōwē apænebopa.

¹⁸Wængonguī pōnō cæcä beyænque watapæ bacæīmpa, ante mīnitō pōnente tocæmīnīmpa, ante cædinque Wængonguī mīnitō ĩmīnīte aa pegacāīmpa. Ayæ adobaī, Mōnō tōmengä quīmō inte tæiyæ waēmō bayōmonte tōmengä nānō godōmenque ñāō ěmonguīnque mōnō ĩmonte ængacāīmpa. Māñīne mēnea edæ nāwangä ĩnepa, ante mīnitō ēñencæmīnīmpa, ante botō, Wængonguī bitō tōmēnāni mīmōnē tīca ēnente bai odōmonte apænebi ate do ēñencædānīmpa, ante Wængonguī ingante apænebopa. ¹⁹Mōnō nē pōnēmō ĩñōmonte Wængonguī nānō pōnō cæquīñō ante tōmengä nānō tæī piñæmāmo æpodō ĩ, ante mōnō ædō cæte tee mante aquīī. Īncæte mīnitō, Māñīmāmo ante æpodō ĩ, ante epeteoidi ēñencædānīmpa, ante botō Wængonguī ingante apænebopa. Edæ, Tōmengä nānō tæī piñæmāmo ĩñōmō æbānō ĩ, ante ēñencæte ante mōnō, Tōmengä gomonga tæī piñæñongä inte ĩīmaī cægacāīmpa, ante ēñengæīmpa.

²⁰Nē tæi piñænongä inte Wængongui angä ate mönö Codito iñömö do wæningä inte edæ do ñäni ömæmongacäimpa. Ayæ godömenque tæi piñæninque Codito ingante öönæde ænte mäidinque Wængongui tömëmæ inö angä Codito tæ contagacäimpa. ²¹Edæ acämenque pedænguipoga iñonte miinguipoga iñonte ñænængä inte nē angä inaa, æcämenque nē awënë inaa, æcämenque tæi piñænte ongongå inaa, æcämenque ingante, Awënë ingampa, ante godö pemönäni inäninäni tömänäni öñönäni que incädänimpa. Mönö Codito adocanque ingante ogæ æænonte bai cædinque Wængongui angä ate tömengä wæætē Tæiyæ Awënë bacä acäimpa. ²²Ayæ Wængongui tömäo iñömö ongoncoo Codito öñowaca inö pönö wææntodöninque edæ, Bitö edæ Tæiyæ Awënë inömi inte edæ æmonga pöni ongoncæbiimpa, angacäimpa. Ayæ, Bitö imite godongämæ nē pönänäni tömənäni Ocamö bai iñömite, ²³tömənäni wæætē bitö baö bai adoyonque bai incädänimpa. Codito ingante mänömainö ante apænedinque Wængongui, Bitö nē Awënë inömi inte tömäo iñömö ongoncoo tömancoo bitö nempo ongoncooque bacäimpa. Ayæ bitö imite nē pönänäni iñömö bacoo inäni yebänäni ininque bitö enempodö eyede pöni bacäimpa, ante Wængongui Codito ingante pönö cægacäimpa.

**Wængongui nänö waadete
pönönö beyænque quëwëmö**

2 ¹Minitö guiquënë wëenënedē ēñänämai cæte quëwëmini inte wënæ wënæ mini cædo beyæ dobæ edæ wæwocaimini ingaminimpa. ²Nē inguipogaque ante pönänäni taadö adodö cægonde bai minitö mäniñedē edæ wënæ wënæ cæte quëwëgaminimpa. Ayæ wënæidi tæi piñænte nani owocabo awëmö iñömö nani cægönö adodö gote bai minitö tömənäni awënë miñæ tee empote godinque wënæ wënæ cægaminimpa. Nöwo incæ Wængongui nänö änö ante

nē ēñänämai cæte quëwënäni guiquënë adocä wënæ awënë nänö pönëwënö ante ēñente ewocadinque cädänipa. ³Wëenënedē tömənäni tönö godongämæ quëwëninque mönö tömämo adobai imæcaque ante pönëninque mönö towëmämoque ante quëwëngamöimpa. Quiëmenque ante towencæte ante mönö cæinëwënö ante cædinque mönö ocaidē ædëmenque pönëninque mönö cæinëwënonque cæte quëwëngamöimpa. Ininque wadäni nani tente wæquënëno bai mönö adobai imæcaque ante pönente nē cæmö inömö inte edæ Wængongui nänö piinte panguënemämo ante edæ do tente wæquënëno ingamöimpa.

⁴Mänömai ingaimö iñömonte Wængongui mönö imonte nanguï waadete pönëninque iïmai nanguï waadedongä inte pönö waa cægacäimpa. ⁵Mönö ēñänämai cægäinö beyæ ante wæwocate wæyömonte tömengä pönö cæcä beyænque mönö Codito tönö godongämæ quëwëmompä. Minitö edæ Wængongui nänö waadete pönö cægäinö beyænque quëwëmini iminipa. ⁶Wængongui angä Codito ñäni ömæmöñongä mönö tömengä tönö godongämæ ñäni ömæmonte bai miïmö badinque quëwëngamöimpa. Ayæ mönö tömengä nempo quëwëmö iñömonte Wængongui iñömö Itota Codito ingante ææntodöninque mönö imonte öönæde ææntodonte Itota tönö pönö gönongä tæ contate bai ongömompä. ⁷Mänömai Itota Codito nempo quëwëñömonte Wængongui iñömö, Botö pönö waadete cædinque godömenque gomonga cæbo acädänimpa, ante cægacäimpa. Ayæ, Miinguipo badömo ate botö mäniñedē ate odömömo adinque tömänäni, Wængongui nänö waadete pönö cæganca wadäni dicæ adoganca cädäniyaa, ante wæcädänimpa, ante cæcæte ante mänömai cægacäimpa.

⁸Edæ Wængongui nänö waadete pönö cægäinö beyænque minitö mini quëwënguinque wede pönëmini baminitapa. Incæte minitö dicæ nämä mini cæinö beyænque nē wede

pönëmini baminitawogaa. Wæætë edæ Wængongui pönongä änninque minitö nê wede pönëmini baminitapa. ⁹Īninque, Nāmanque cæte quëwëmo aedāni, ante mönō edæ ānāmai ingäimpa. Īnæmpa wīi mönō cædō beyä quëwëmompā. ¹⁰Edæ Wængongui nānō nê badongaīmō ĩnōmō ĩmompā. Ayä, Codito nempo nê quëwënāni ĩmai cædinque waa cæcædānimpā, ante tōmengä wëenënedë mönō cæquënënō ante eyepæ badongacäimpā. Īninque mönō ĩmonte badōninque tōmengä, Codito Itota nempo quëwëninque minitö mini waa cæquënënō ante edæ cæte quëwencæminimpā, ante pönō badongä bagamōimpā.

**Codito beyænque ganca
pönëmompā, ante**

¹¹Mānōmai beyä minitö, Doyedë ĩmai ingatimpā, ante pönëedāni. Oodeoidi ĩñōmō önompoca æmontaique ëō togäināni inte nāmanque ante edæ, “Në ëō togäimōni ĩmōnipā,” ante pemonte bai apænëdānipā. Wæætë minitö oodeomīni ĩnāmai nê ëñagaimīni ĩñōmīnite, “Bagāamīni ĩmīnipæä,” ante mānīnāni pīwënāni wægāmīnimpā. Īninque mīnitö māñīnedë æbānō ingāimīni ĩnōmīni, ante yewæmōmo ate pönëedāni. ¹²Māñīnedë edæ mönō Codito nempo quëwënāmai ingāimīni inte minitö möni idægocabo nempo adobai edæ quëwënāmai inte nānënë quëwengāmīnimpā. Īninque Wængongui, ĩmai cōwë pönō cæcæboimpā, ante nānō angainō ante mönītō godongāmæ Ao ante ëñente quëwëñōmōnite minitö wæætë gobæ nānënë quëwëninque Wængongui nānō angainō ante edæ ænāmai ingāmīnimpā. Watapæ bacäimpā, ante mönītō pönënō ante mīnitö ĩñōmō nānënë quëwente ædō cæte watapæ pönente toquimīni. Gobæ quëwëninque mīnitö Wængongui nempo edæ quëwënāmai ingāmīnimpā. ¹³Incæte mīnitö gobæ nê quëwëñōmīni ĩñōmīnite Itota Codito nāmā wepæ godonte ænninque mīnitö ĩmīnite ænte

māmongä eyequei pōni pōninque mīnitö ñōwo tōmengä nempo quëwëminipā.

¹⁴Wëenënedë mönītō tönō mīnitö guëadō guëa cædōmō ingāimō inte mönō, Nānënë incæminimpā, ante wææ cæ impā tæcæguedë wææ gönonte bai cægāmōimpā. Codito ĩñōmō nê piyænë cædongä inte, Wææ cæ impā, mönō ānompā bæ tate wido cæte bai cædinque mönō ĩmonte äññōmonque badongä bamōimpā. Īninque tōmengä mīmōnë nê piyænë cæte entawënongä ingä beyænque mönō adobai gänë pönëmompā. ¹⁵Edæ Wængongui, ĩmai cæedāni, ante wade wade ante nānō wææ angainō ante ëñënninque dodāni godōmenque wææ angadānimpā. Mönō Codito ĩñōmō inguipoga pōninque māñine ante tōmānō ante ëñente cæte quëwengacäimpā. Ayä, Idæwaa wææ ante impā, ante bai cædinque tōmengä māñine ante nāmā baonga mongænte wënninque tee moncate bai cægacäimpā.

Mānōmai cædinque tōmengä, Mīnitö mencaboga inte nānënë quëwëminī incæte ñōwo piyænë cæte botō nempo godongāmæ quëwencæminimpā, ante cædinque mönō ĩmonte ænte wempo cægacäimpā. Īninque mönō edæ piyænë cæte quëwengūnque edæ äññōmonque bagamōimpā. ¹⁶Itota Codito ingante awāa timpodāni wængä ĩninque tōmengä mönō guëadō guëa piinte cægāimāmo ante ænte mongænte wido cæte bai wængä beyænque mönō piyænë cæmō bagamōimpā. Ayä ado tōmengä awāa nānō wængainō beyænque mönō tōmāmō adocabomō bamō adinque Wængongui wæætë piyænë cædinque mönō ĩmonte Ao ānninque ængacäimpā. ¹⁷Mīnitö guiquënë gobæ nānënë quëwëñōmīnite mönītō guiquënë Wængongui weca eyequei quëwëñōmōnite Codito ĩñōmō inguipoga pōninque mönō tōmāmō ĩmonte apænëdinque, Piyænë cæte gänë pönente quëwëedāni, ante pönō apænecä ëñentamompā. ¹⁸Tōmengä nānō pönō cægāinō beyænque möni oodeocabo adobai mīnitö wāmīni adobai

mönö tömämö Wængongui Önöwoca adowocaque ingante ewocamö inte mönö Wæmpocä weca tömämö do pömompa.

¹⁹İnque mönitö Wængongui quimöni do bagaimöni inte Wængongui nempo quëwëmöni ingaimöni bai Codito nänö pönö cægainö beyænque minitö adobaï mönitö tönö adocabomini do badinque edæ Wængongui nempo quëwëmini iminipa. İnque minitö ñowo idæwaa wamini ingaiminipa. Wïi wabaca quëwente bai edæ tömëmini oncönë ponte owote bai minitö ñowo Wængongui nempo quëwëminipa.

²⁰Woadäni dica täno gönöningue tänocaa wänömënæca mænönäni bai Wængongui adobaï cædinque Itota Codito ingante täno gönongä ongöñongante tömengäa godö mænonte bai cædinque mönö imonte iïmai cædinque pönö gönongä gongæmompä. Codito nänö në da godongaimöni tönö tömengä beyæ në apænemöni tönö inömonite Wængongui mönitö imönite æninque wänömënæca gönongä gongæñömonite wadäni inänite gä æænö tæi mænonte bai gönongä gongænänipa.

²¹Codito nempo quëwëñömonite Wængongui mönitö imönite adocooga gö cæte bai pönö tæi mænongä ate mönitö æicö bai bacö bai bamönipa. Edæ Wængongui Tæiyæ Waëmö Önöwoca ingante aanque bai ewocadinque mönitö godongämæ Awënë tæiyæ waëmö oncö bai bamönimpa. ²²Bayömonite minitö adobaï tömengä nempo ongöñöminite Wængongui minitö iminite æninque mönitö tönö godongämæ mämö adocooga gö cæte tæi mænonte bai cædinque, Minitö botö Önöwoca tönö äawocaque bai ewocadinque botö owoquincö bai baminipa, ante pönö badongacäimpa.

Oodeoidi inämai inäni inänite apænecæ gotabopa, ante

3 ¹Mäninö beyæ iïmai ante apænebopa. Botö Pabodobo inömö Codito beyæ ante oodeomini inämai

imini iminite apænecæte ante cæyömate botö imote edæ tee mönedäni wädömo inte yewæmömopa.

²Minitö oodeomini inämai imini inömö iïmai ante wabänö ëñëminitawo. Wængongui pönö angä ëñëninque botö minitö beyæ tömengä nänö waadete cædonö ante në apænequënëmo batabopa. ³Mäninö ante botö, Wængongui awëmö nänö cægainö ante botö imote edonque odömongä atabopa, ante do wædænque yewæmömo aminitawo. Edæ adodö ante ñowo yewæmömopa. ⁴İnque mänömainö ante botö do yewæmöninta adinque minitö, Mönö Codito awëmö nänö cægainö ante Pabodo do ate bai ëñengampa, ante ëñëmaiminipa.

⁵Mönitö wæmæidi nani quëwënedë në quëwengainäni inömö, Mönö Codito iincayæ ate pöningue æbänö awëmö cæquingäa, ante ëñënaïmaï inte wægadänimpa. Ñowo guiquënë Codito beyæ në apænëdäni tönö mönitö tömengä nänö në da godönimöni tæiyæ waëmö bamöni inömonite Wængongui Önöwoca mäninö ante edonque odömonte apænecä ëñëmönipa.

⁶Iïmai ante impa. Mönitö Wængongui nänö pönonguincoo në ænguimöni inömonite minitö oodeoidi inämai imini inte mönitö tönö adocabomini badinque edæ mönitö tönö godongämæ në ænguimini adobaï baminipa. Ayæ, Itota Codito tönö pönö cædinque Wængongui nänö, Cöwë cæcæboimpa, ante angainö do cægacäimpa, ante watapæ pönëninque minitö mönitö tönö edæ godongämæ quëwencæminipa.

⁷Wængongui në tæi piñænongä inte waadete pönö nanguï cæcä adinque edæ tömengä beyæ në cæbo badinque botö Codito ingantedö ante në watapæ apænebo batabopa. ⁸Mönö tömämö Wængongui quimö inömonte botö inömö wamini bai wïi imopa. Botö adoboque wädämo pönö imo incæte Wængongui waadete cædinque pönö angä ëñëmo inte botö minitö iminite në apænëbo batabopa. Codito nänö

pönö cægainö ante æpodö i, ante mönö ædö cæte tee mante ëñenguī. Incæte Wængongui waadete pönö cæcä beyænque botö iñömö Codito waa pönī nänö pönö cægainö ante edæ oodeo ināmaī imīni imīnite nē apænequēnēmo batabopa. ⁹Ayæ Wængongui tōmancoo nē badongaingä inte wēēnēñedē nāmanque entawēninque awēmö nänö wē wodongäinö ante botö imote odōmonte apæneçantapa. Ayæ, Pabodo mānīnö ante edonque odōmonte apænequēnēngä ingampa, ante tōmānāni ëñencädänimpa, ante pönö apænecä äntabopa.

¹⁰Codito ingante mönö godongämæ pönencabo iñōmonte tömengä wadö wadö ante tōmānö ante nē ëñengaingä inte mönö tönö godongämæ cæcampa. Mönö tönö mānōmaī cædinque tömengä, Botö wadö wadö ante tōmānö ante botö ëñengainö ante adinque öönädē quēwēnāni awēñēidi tönö māñiñömö nē ānāni tönö wæcädänimpa, ante cægacäimpa. ¹¹Wēēnēñedē pedämāmo iñonte Wængongui, Cæbo ate awēñēidi incæ wæcädänimpa, ante cōwē pönengacäimpa. Nōwo iñömö tömengä māñinö ante nänö pönengainö ante tömengä mönö Awēñē Itota Codito tönö godongämæ cædinque do cægacäimpa. ¹²Codito nempo nē quēwēmö inte mönö tömengä ingante wede mönö pönēnö beyænque guiñēnāmaī inte Wængongui weca do pöninque apænemompa. ¹³Mānōmaī impa, ante edæ mīnitö beyæ ante cædinque botö caate wædö ante pönēninque mīnitö wæætē wädāmaī iedāni. Wæætē, Mönitö godōmenque ñäö baī ëmoncämönimpa, ante Pabodo caate wæcampa, ante pönēninque mīnitö wädāmaī incämīnimpā ämopa.

Codito nänö pönēnö ante

¹⁴Māñinö beyæ mönö Awēñē Itota Codito Wæmpocä iñongante botö tömengä öñowaca iñö da guicapodinque apænebopa. ¹⁵Tömengä iñömö edæ adocanque nāwä Wæmpocä ingampa.

Iñinque inguipoga quēwēmö incæ öönädē quēwēnāni incæ tömengä ingante, Mæmpo, ante nē tedemö iñömö mönö tömengä tönö mönö wæmpocabo baī imompa.

¹⁶Iñinque mönö Wæmpocä ingante apænedinque botö mīnitö beyæ ante iñmaī ante apænebopa. Wængongui bitö nē ñäö baī entawēmi iñömi inte bitö Tæiyæ Waēmö Öñowoca ingante epeteoidi iñānite da pönömi æninque tömēnāni wæætē edæ mīmö tæī piñænte entawencädänimpa, ante apænebopa. ¹⁷Ayæ, Mönö Codito adobaī mīnitö weca pöñongante mīnitö mīmönē wede pönēninque tömengä ingante ædämö entawencämīnimpā, ante mönö Wæmpocä ingante apænebopa. Ayæ, Awæ ædämö guiwa inte tömēmæ äwäate pæwæ baī cædinque mīnitö iñömö adobaī tömengä nänö waadete pönēmāmo entawēninque edæ mīmönē tæī ongömīni bacämīnimpā. ¹⁸Ayæ mönitö Wængongui quimōni tönö mīnitö adocabomīni inte tæī piñämīni badinque, Itota Codito nänö waadete pönēnö ante ægancadö owoo, ante ëñencädänimpa, ämopa. Ayæ, Tömengä nänö waadete pönēnö iñömö edæ yepanca pönī owopa, oopänö pönī owopa, æibæ pönī owopa, wincamö pönī owopa, ante ëñencädänimpa, ante apænebopa. ¹⁹Ayæ edæ, Mönö Codito waadete nänö pönēnö æbānö gomonga pönī owoo, ante mönö ædö cæte ëñenguī, ante mönö wædö incæte mīnitö māñinö ante ëñencämīnimpā. Ayæ edæ, Māñinö ante ëñēmīni inte mīnitö Wængongui nänö nanguī entawēnö edæ eyepæ pönī entawencämīnimpā, ante botö mönö Wæmpocä ingante apænebopa.

²⁰Mönö ānö ante ayæ mönö pönēnö ante eyepæ cædongä inte Wængongui iñömö mönö imonte tæī piñænte nänö cæpāmo ganca cædinque nanguī gomonga cæcä ingampa. Iñinque ñōwo iñömö mönö Wængongui ingante waa ate pönente apænecäimpa. ²¹Edæ do wænte æigaināni tönö ayæ ate ëñate

quëwenguinani tönö mönö tömämö
 Codito ingante godongämä mönö
 pönencabo inömö inte Itota Codito
 ingante ëwocadinque mönö godongämä
 apäñecäimpa. Mæmpo Wængonguï
 ëñëmi. Bitö adobique ñäö ëmongaïmi
 inömi ïmipa, ante mönö ñimpo cädämaï
 inte cöwë waa ate apäñecäimpa.
 Mänömaï impa, ante botö, Amëë,
 ämopa.

**Codito nempo quëwëninque
 adocabomö ïmopa**

4 ¹Waa cæte quëwencæminimpa,
 ante Wængonguï aa pecantapa,
 ante ëñëmini inte minitö tömengä
 nänö änonque ante ëñente cædinque
 quëwencæminimpa. Botö mönö Awënë
 beyä tee mönete wæcömo incæ
 ämo ëñëedäni. ²Minitö nämä ængö
 cädämaï inte, Önömoque bai ïmopa,
 ante pönëninque wadäni inänite
 edæ ædæmö cæedäni. Æiuedö waa
 cæquïnänii, ante wädämaï inte edæ
 piyänë cæte quëwëedäni. Ayä wadäni
 minitö ïminite wënæ wënæ cädäni
 wædinque tömënäni inänite wæætë
 pïinämaï inte ædæmö waadete cæedäni.
³Minitö, Mönö pönencabo piyänë
 cædinque cöwë adodö ante pönente edæ
 Wængonguï Önöwoca tönö äanque bai
 ee ëwocacäimpa, ante nanguï cædinque
 wacä ingä wacä ingä edæ waa cæedäni.
⁴Mönö Awënë pönö cæcä ate watapæ
 bacäimpa, ante minitö adodeque
 ante pönente tocæminimpa, ante
 Wængonguï minitö ïminite edæ
 adodeque ante aa pegacäimpa. ïninque
 mänine, Watapæ bacäimpa, ante mini
 pönëne adodeque i bai Wængonguï
 Önöwoca edæ adobaï adowocaque inte
 quëwengampa. Tömengä adowocaque
 nempo quëwënömö inte mönö adobaï
 edæ adocabomonque inömö ïmopa.
⁵Mönö Awënë edæ adocanque pöni
 inongä ïñongante tömengä ingante
 mönö wede pönëno adobaï adodeque
 pöni ïnepa. Ayä adodö ante pönëninque
 æpänë guiddinque mönö adopäñenque
 guuite bai guuitamopa. ⁶Wængonguï

adocanque pöni inongä inte tömengä
 tömämö Wæmpocä adocanque ingampa.
 Tömengä ïñömö edæ Tæiyä Awënë pöni
 inongä inte tömämö ïmonte në aacä
 ingampa. Tömengä adocanque pöni
 nempo quëwëñömönte tömengä wæætë
 mönö tömämö mimönë quëwengampa.

⁷Incæte mönö Codito, Mimönë bitö
 entawenganca ænte cæe, ante tee
 mante bai cædinque adocanque ingante
 waadete pönö cædinque wacä ingante
 waadete pönö cædinque edæ tömämö
 ïmonte tömengä nänö pönö cæcöo
 eyepæ pönongä æninque entawëmopa.

⁸Codito mänömaï cæcæcäimpa, ante
 pönëninque awënë Dabii wodi ïïmaï
 ante yewæmongacäimpa.

“Tömengä æibæ æicæ cædinque
 wadäni inänite bai ongonte ñä
 cæyante tömengä miñä ænte
 mäicä æigadänimpa.

Ayä æidinque tömengä mönö
 waocabo ïñömönte, Minitö
 entawenguinö, ante eyepæ pædæ
 pönongä ænte entawengamöimpa,”
 ante Dabii nänö yewæmonte angainö bai
 impa.

⁹Mänine, “Æigacäimpa,” ante nani
 angaine ïñömö quinate yewæmongatïi.
 Edæ, Tömengä inguipoga tadömengadæ
 do wææningä inte æigacäimpa, ante
 odömoncæte ante yewæmongatimpa.

¹⁰Në wæængaingä inongä ïñömö
 adocä do öönædë gömonga æidinque
 inguipoga tömäo öönædë tömäo tömäo
 ïñömö edæ godömenque æibæ pöni
 quëwengä inongä ingampa. ¹¹Tömengä
 tömancoo në ënemocä inongä inte
 adocä mönö waomö ïmonte pönö angä
 ænte entawëninque mönö ïïmaï cæmö
 bamöimpa. Pancamöniya ïmönite
 tömengä angä ëñëninque tömengä
 nänö në da godongaïmöni batamönipa.
 Pancamöniya guiquënë Wængonguï
 waa pöni nänö pönö cægainö ante në
 apänemöni batamönipa. Pancamöniya
 guiquënë Wængonguï beyä në
 apänemöni batamönipa. Pancadäniya
 guiquënë në aadäni badänitapa. Ayä
 pancadäniya guiquënë në odömonte

apænedāni badānitapa. ¹²Mānōmaī pōnō cædinque mōnō Codito mōnō ocamō bai inongā inte, Botō baō bai adoyonque bai ināni iñōmō ñancæ äate bai tæi piñænāni ewocacædānimpa, ante pōnō cægacāimpa. Mōnō imonte tōmengā, Mīnitō Wængonguī quimīni inōmīni inte tōmānāni inānite nē cæmīni inte godō cæcæminimpa, ante pōnō cægacāimpa.

¹³Mīni wede pōnēnō ante mīnitō tōmāmīni adoyōmō ante pōncæcæminimpa, ante mōnō Codito pōnō cægacāimpa. Ayæ, Botō Wængonguī Wēmo iñōmote mīnitō botō imote ate bai pōncæcæminimpa, ante tōmengā pōnō cæcampa. Ayæ æmæwo pæmīni bai mīni baquinque mīnitō botō entawēnō ædæmō entawencæminimpa, ante Codito edæ da pōnongā eyepæ æmōmpa. ¹⁴Īnīnque æmæwo pædimō inte wēñæmō ināmaī imō īnīnque mōnō edæ oda cædāmaī ingæimpa. Wadāni guiquēnē mā pōnēninque, Æbānō cæmō ate oda cæquīnānīi, ante edæ nāmāneque tedewēnānīpa. Tōmēnāni iñōmō edæ babæ cæcæte ante cædinque waa cæte bai cædāni ataqueedāni. Woboyæ ædæ go ædæ go pæmænte bai cædinque tōmēnāni wadō ante odōmonte tedewēnānīpa. Mānōmaī wido piñænte bai cædāni incæte mōnō iñōmō Codito nānō entawēnoncoo ænte entawēninque äā mænāmaī ingæimpa.

¹⁵Wæætē Wængonguī, Nāwangā pōnī impa, ante nānō apænegaīnō ante mōnō tōmānāni inānite waadete pōnēninque apænecæimpa. Mānōmaī cædinque mōnō Codito baō bai iñōmonte tōmengā nē Ocamō bai inte pōnō angā beyænque mōnō ñancæ äadinque godōmenque picæmō bamōmpa. ¹⁶Mōnō baonga wepæ eyepæ eñadinque ñancæ äadinque tæi piñænte pæte quēwēmōmpa. Adobaī mōnō Codito baō tōnō adoyonque bai inōmō inte mōnō tōmengā nānō apænedō ante eñēnōmo inte ñancæ äate pæte bai quēwēmōmpa. Ayæ wæætē ocai encamō inte mōnō pæ pagænguīnque wangō tēnāmaī oguīncāi bamē impa. Ayæ adobaī mōnō Codito nānō waadete

pōnēnō ante mīmōnē entawēmō inte mōnō wacā ingā wacā ingā godō aamō inte mōnō pōnencabo incæ edæ tæi piñænte entawēmōmpa.

Codito nempo mōnō iīmaī quēwēmōmpa, ante

¹⁷Īnīnque mōnō Awēnē nempo quēwēnōmo inte botō nō āmo eñēedāni. Wadāni nē eñēnāmaī ināni ōnonquedō ante pōnēninque quēwēnānīpa. Mīnitō guiquēnē adobaī quēwengāimīni inte ñōwo wæætē ñimpo cædinque mānōmaī cædāmaī inguēnē quēwēmīnīi.

¹⁸Tōmēnāni guiquēnē mīmō eñēnānīpa diyæ Wængonguī weca ponguīnānīi. Mīmō ōmædēnāni inte tōmēnāni ocai eñēnāmaī badāni beyænque Wængonguī weca pōnāmaī inānīpa. Edæ wentamō mongæninque tōmēnāni ocai wēmō encadāni inte idiquibæ ante pōnēnānīpa. ¹⁹Īnāni iñōmō tōmēnāni nāni cæquēnēnō ante ñimpo cædinque ñōwo wæætē guīñēnāmaī inte baō nāni towēinēnō ante cæcæte ante nāmā pædæ godonte bai edæ cædānīpa. Edæ, Quiēmē wīwa cæquīi, ante mānīnonque cæcæte ante godōmenque cæinente wædānīpa.

²⁰Wæætē mīnitō guiquēnē, Mōnō Codito æbānō ingāā, ante pōnēninque edæ wīi tōmēnāni nāni cæinēwēnō bai mīni cæquinque edæ pōnēmīnitapa.

²¹Tōmengā apænecā edæ wīi eñēmīnitawo. Īñæmpa, Wængonguī nō pōnī nānō apænegaīnō eñēninque Itota iñōmō mīmōnē entawengampa, ante mīnitō tōmengā nempo quēwēñōmīnīte tōmengā mānōmaīnō ante adodō ante edæ do odōmonte apænecā eñēmīnitapa. ²²Mīnitō wēnēñedē mīni cæte quēwengāinō ante tōmengā iīmaī ante odōmonte apænecāimpa. Babæ pōnente mīni cæinente wæwēnō beyæ mīnitō mīmōnē wentamō mongænte wæwēmīni inte do mīni entawengāinō ante edæ wido cædāni, ante odōmonte apænecāimpa. ²³Edæ mempoga eñagaīmīni inte mīnitō eñēnō do mīi pōnī encamīni inte mīīnonque ante

pönencæminimpa, ante odömönte apæneçä ëñëmînitapa. ²⁴Ayæ, Botö pönö badömo ate mînitö botö bai tæiyæ waëmö ewocadinque nö pönî çæte quëwencæminimpa, ante Wængongui pönö badongä ate mînitö mîmîni bagaminimpa. Ìnînce tömengä, Mänînö Wængongui nö pönî nänö entawënö ænînce mînitö ædæmö entawencæminimpa, ante odömönte apæneçä do ëñëmînitapa.

²⁵Mänömaï beyæ mînitö tömämîni, Mönö adocabomö ìmopa, ante adînce babæ mîni tedewëninö ante ñimpo çædinque wacä ingante wacä ingante näwangä ante apæneedäni.

²⁶Ængui bamîni incæte mînitö piyænë çædinque wacä ingante wënæ wënæ çædämaï ee æedäni. Edæ gäwædecæ ganca nanguï pîinînce edæ mîni wæquinque ìmaïmpa. ²⁷Mänömaï çædinque mînitö, Wënæ incæ pönö çæcä ate botö ængui batabopa, ante pönente wædinque ñowo wæætë, Wënæ botö weca pönämaï incæcäïmpa, ante nämä wææ çæedäni.

²⁸Në awëmö æningä ìñömö ñowo edæ ee çædinque awëmö ænämaï incæcäïmpa. Wæætë, Botö önopoca nanguï çædinque ænte quëwëninque në ænguënëñäni ìnänite adobaï godömo æncædänimpa, ante çæcæcäïmpa.

²⁹Mînitö nämä önöne wææ aadînce wiwa ante tededämaï ìedäni. Wæætë edæ, Wädäni æbänö ante ëñenguënëñäni ìnänii, ante pönëninque mînitö, Tömënäni tæï pîñænte entawencædänimpa, ante çædinque në ëñëñäni beyænque ante waadete godö çædinque apæneedäni. ³⁰Wængongui Tæiyæ Waëmö Öñowoca ìñömö mînitonga pö guidînce, Botö æmo beyænque mînitö ìncayæ ate æmæwo abæ tawænte gote bai quëwencæminimpa, ante odömonçæte ante yewæmonte bai çægacäïmpa. Ìnînce mînitö, Wënæ wënæ möni çædö beyæ ante Wængongui Öñowoca wæwente badämaï incæcäïmpa, ante wææ çædinque edæ ëñente çæedäni.

³¹Ayæ, Wiï waëmö awædö, ante mîni pîiwëninö ante edæ ñimpo çæedäni. Äimö ante mîni pönëwëmämo adobaï ñimpo çædinque ængui pönî mîni badimämo edæ ñimpo çæedäni. Yæ ante mîni pîinte ogæ tedewëmämo, wacä ingante ante mîni pîinte tedewëmämo edæ ñimpo çæedäni. Ayæ pîinte çæquinque ante mîni entawëninö ante tömänö edæ wido çæedäni. ³²Wæætë godongämæ waadete çædinque wacä caate wæcä adînce mînitö godongämæ Ca ca wæcæminimpa. Ayæ Codito ængä beyænque Wængongui mînitö ìmînite pönö ñimpo çæcampa çæminii. Tömengä ñimpo çæcä quëwëmîni bai mînitö adobaï çædinque wädäni wënæ wënæ çæyönänite wacä ingä wacä ingä ñimpo çæmîni quëwëñäni.

Wængongui wëmîni, ìmaï çæte quëwëedäni, ante

5 ¹Ìnînce Wængongui wëmîni ìñömö mînitö tömengä nänö në waademîni ìñömîni inte Wæmpocä nänö çæi bai ante cöwä adînce adobaï çæedäni. ²Baö, Wængongui qui, ante godöninque, Ogui wacæïmpa, ante iya tänäni bai çædinque Codito mönö ìmonte waadete pönëninque edæ adobaï çægacäïmpa. Tömengä ìñömö, Botö Wængongui quïmo ìmopa, ante nämä wepæ pædæ godöninque mönö ìmonte wæætë ængacäïmpa. Ìnînce tömengä nänö waadete pönëñö bai mînitö adobaï waadete pönëninque quëwëedäni.

³Wæætë edæ mîni pönencabo ìñömînite waocä adocanque incæ nänöogængä ìnämaï ìñongante godö guëa mönämaï ìedäni. Wentamö mongæ wæcæ wæ, ante edæ wiwa çædämaï ìedäni. Nanguï mäincoo ante æinente wædämaï ìedäni. Mänînö tömänö çædämaï ìmîni inte mänînö ante edæ adopoque incæ tededämaï ìmäwedäni. Edæ Wængongui quimîni tæiyæ waëmö entawëmîni inte mînitö mänînö tömänö çædämaï incæminimpa. ⁴Wentamö ante nänî pönëwënö bai mînitö wæætë adobaïnö ante pönëñämaï

iedäni. Önonque ante nāni tedewēnō bai mīnitō wæætē adobaī tededāmaī iedāni. Wēnæ wēnæ ante pōnente nāni badete towēnō bai mīnitō wæætē adobaī badete todāmaī iedāni. Īnæmpa Wængonguī quīmīni ĩnōmīni inte mīnitō mānīnō ante wīī pōnenguēnēmīni ĩmīnīpa. Wæætē Wængonguī ingante waa ate pōnēnīnque apænequēnēmīni ĩmīnīpa.

⁵Awēnē Odeye Wængonguī nempo ayæ Awēnē Odeye Codito nempo edæ ædānidō nē guīite ænguīnāni ĩnānīi. Nānōgængä ĩnāmaī ĩñongante nē towēnāni tōnō wentamō pōnente nē cædāni ĩñōmō tōmēnāni edæ dicæ guīite ænguīnāniyaa. Ayæ māincoo ante wacä qui nē æīnente wæwēnāni ĩñōmō edæ, Māincoo incæ mōnitō wængonguī impa, ante bai cædāni ĩnōnāni inte tōmēnāni adobaī edæ guīite ænāmaī incædānīmpa. Ante āmo ēñēedāni. ⁶Wadāni, Mīnitō oda cæcæmīnīmpa, ante önonquedō ante tedete cæyōnānite mīnitō wæætē tōmēnāni nāni tededō ante edæ ēñēnāmaī iedāni. Edæ tōmēnāni ēñēnāmaī inte nāni wēnæ wēnæ cædō beyæ Wængonguī ænguī badīnque tōmēnāni ĩnānite pancæcāīmpa. ⁷Īnīnque mīnitō gooque gomō adīnque tōmēnāni tōnō godongāmæ cædāmaī iedāni.

⁸Mīnitō ĩñōmō wēēnēñedē wentamō mongæmīni ingāīmīni inte ñōwo wæætē edæ mōnō Awēnē nempo quēwēnīnque edæ ñāō bai entawēmīnīpa. Īnīnque Mæmpo nānō ñāō ēmōnō bai entawēmīni inte mīnitō ñāō ĩñōmō cægonte bai edæ waa quēwēedāni. ⁹Edæ waiwæ waincate bai cædīnque mōnō wadāni ĩnānite godō waa cæquīnque mōnō edæ ñāō ĩñōmō quēwēmōmpa. Ayæ nō pōnī mōnō cæquīnque nāwangä pōnī ante mōnō apænequīnque edæ ñāō ĩñōmō quēwēmōmpa. ¹⁰Ayæ, Æbānō cæmō ate mōnō Awēnē, Waa cæmīni abopa, ante apænequīngä, ante ēñēncæte ante cædīnque do ēñēnīmi inte tōmēngä nānō waa adonque cæedāni. ¹¹Wadāni wēmo ĩñōmō önonque nāni cædō ante adīnque mīnitō ĩñōmō

edæ gooque gomō aedāni. Ayæ tica ēnente bai cædīnque, Tōmēnāni nāni cædō wēnæ wēnæ impa, ante edonque odōmōmīni acædānīmpa. ¹²Awēmō nāni cædō beyæ guingo imonte wæquēnēnāni ĩñōnāni mōnō ĩñōmō edæ guīñēnēte wædīnque mānīnō ante edæ tededāmaī ingæīmpa. ¹³Wæætē edæ, Awēmō ĩñōmō æbānō cædānīi, ante tōmānō ante edæ tica ēnente edonque acæīmpa. ¹⁴Ñāō beyænque edæ edonque amōmpa. Mānōmaī ī beyæ ĩīmaī ante āmotamīni ante bai apænedānīpa.

“Bitō wangæ mōīmi inte ñāni
ōmæmōnte ængæ gantīe.

Edæ ængæ gantīyōmīte

Codito incæ pōnō tica ēnente bai
cæcä ate ñāō entawencæbīīmpa,”
ante apænedānīpa.

¹⁵Mānōmaī beyæ mīnitō ocai ömæcamīni ĩnāmaī ĩnōmīni inte wæætē ocai nē encamīni inte cædīnque, Æbānō waa cæte quēwenguīmo, ante nāmā waa ate waa cæedāni. ¹⁶Wadāni ñōwo incæ godōmenque wīwa cædānīpa cæmīnīi. Eyepæ ĩñonte mīni cæquēnēnonque ante edæ do cæedāni. ¹⁷Edæ wēñæñāni owempote cædāni bai mīnitō adobaī cædāmaī iedāni. Wæætē, Wængonguī æbānō angantawo, ante ēñēnīnque mānīnonque ante ēñēnte cæedāni. ¹⁸Wadāni bīñōmæ nāni āmæ bedīnque dowænte badīnque godōmenque pōnēnāmaī cædīnque tōmēnāni nāni ēwente wæwenguīnque bewēnānīpa. Īnīnque mīnitō ĩñōmō bete dowænte badāmaī iedāni. Wæætē Wængonguī Önōwoca ingante ædæmō ēwocate quēwēedāni. ¹⁹Āmotamīni ante bai godongāmæ watapæ ante tedeedāni. Awēnē Dabīi wodi nānō āmotamīni angaintaa adīnque edæ adodō æedāni. Ayæ mīnitō nāmā mā pōnēnīnque, ĩīmaī Wængonguī beyæ mōnō āmotamīni angæīmpa, ante adodō æedāni. Wængonguī Önōwoca angä ēñēnte ēwocadīnque tōmēngä āmotamīni nānō ānōnō ante adodō æedāni. Mīmōno āmotamīni ante bai pōnēnīnque mīnitō mōnō Awēnē ingante

watapæ pönente æedäni. ²⁰Æbämë bayonte minitö tömänö beyæ ante edæ Mæmpo Wængongui ingante cöwë waawate ate pönëninge mönö Awënë Codito ëmöwo ante apæneedäni.

**Mæmpoidi näni wencabo
iïmaï quëwencädänimpa**

²¹Mönö Codito ingante guiñente wædinqe minitö wii nämä mini pönënonque bai cædinqe wæætë edæ, Në änäni æbänö änäni, ante Ao ate mönö ante cædäni.

²²Onquiyæmini ëñeedäni. Minitö, Mönö Awënë nänö angainö bai mönö ëñente cæcæimpa, ante tömëmini nänöogænäni inänite Ao ante ëñente cædäni. ²³Edæ Codito ingante mönö godongämæ pönencabo iñömonte mönö Codito adocä iñömö, Quëwencæminimpa, ante në Ængaingä inongä ingampa. Tömengä tönö mönö adoyonque bai iñömonte tömengä iñömö mönö Ocamö bai inongä ingampa. Ayæ onquiyængä tönö onguiñængä adobai adoyonque bai iñönate onguiñængä iñömö në ocamö bai inongä ingampa. ²⁴Iñinqe Codito ingante mönö godongämæ pönencabo incæ tömengä ingante Ao ante ëñente cæmö bai onquiyænäni adobai tömënanäni nänöogænäni inänite cöwë edæ Ao ante ëñente cæquënënanäni inänipa.

²⁵Wæætë onguiñæmini ëñeedäni. Minitö Codito nänö waadete pönëno bai tömëmini nänöogænäni inänite adobai waadete pönëedäni. Tömengä ingante mönö godongämæ pönencabo iñömonte tömengä iñömö mönö imonte waadete pönëninge mönö imonte æncæte ante pönö cædinqe nämä wepæ godongacäimpa. ²⁶Ayæ, Wængongui nänö apænedö waëmömæ imæ bai iñonte minitö iñömö mäninö ante ëñëninge tæiyæ waëmö ewocate quëwencæminimpa, ante mönö Codito adocä mönö imonte edæ nïa mënongate bai cægacäimpa. ²⁷Mänömaï tæiyæ waëmö badinqe mönö wentamö mongænämaï inte Codito ingante mönö pönencabo adocabomö iñömonte

tömengä iñömö edæ nänöogængä ante bai cædinqe mönö pönencabo imonte, Bitö, ante apænecäimpa. Ayæ mönö cabo iñömonte tömengä, Bitö idiquibæ entawënämaï iñömite ædö cæte bitö imite piñte anguiï, ante pönö cægacäimpa. Ayæ wæætë edæ, Nïa mënongate bai tæiyæ waëmö ëmömi ininqe mönö edæ guëa nïö apäite bai ëmongæimpa, ante Codito nänöogængä ænte bai mönö imonte pönö ængacäimpa.

²⁸Onguiñænäni iñömö adobai tömënanäni, Botö baö, ante näni pönë bai tömënanäni nänöogænäni inänite adobai waadete edæ pönenguënënanäni inänipa. Æcänö tömengä nänöogængä ingante waadete pönëna iñömö tömengä nämä baö ante waadete pönente bai edæ cæcampa. ²⁹Iñæmpa waocä nämä baö cöwë piñnämaï ingampa. Wæætë, Botö baö, ante edæ pæ gompodinqe pönö aacampa. Ayæ adobai Codito ingante mönö godongämæ pönencabo iñömonte edæ tömengä adobai, Botö baö, ante bai cædinqe mönö imonte wææ gompodinqe pönö aacampa. ³⁰Edæ mönö Codito në ocamö bai inongä inte në angä iñongante mönö wæætë tömengä tönö adoyonque bai inte ëñente quëwëmompä. ³¹“Mänömaï beyæ onguiñængä mæmpo tönö badä inate ëmö cæte godinqe onquiyængä ingante, Botö nänöogængä, ante æmæwo monte quëwencæcäimpa. Mënaa inina incæ tömëna wæætë nana gæncaya badinqe adocanque bai bacædäimpa,” ante yewæmongatimpa.

³²Mänömainö ante näni yewæmongainö ante edæ wë wodonte bai i iñonte wii tömänö ante ëñëmompä. Incæte, Codito ingante mönö godongämæ pönencabo iñömonte mönö tömengä tönö adocanque bai imöimpa, ante minitö ëñencæminimpa, ante botö apænëtabopa. ³³Incæte onguiñæmi nämä bitö waadete pönënonganca tömëmi nänöogængä ingante edæ adonganca waadete pönencæbiimpa. Onquiyæmi adobai, Botö nänöogængä

ingampa, ante adinque edæ ēñente cæcæbiimpa.

6 ¹Wēñæmini guiquēnē ēñēedāni. Minitō mōnō Awēnē nempo quēwēnōmīni inte tōmēmīni mæmpoidi inānite edæ ædæmō ēñente cæedāni. Æcānō edæ mǎnōmaī cædaa tōmengā edæ nō pōnī cæcampa. ²“Wæmpocā ingante wāānā inante waa adinque tōmēna inate godō waadete cæe,” ante Wængonguī incæ wææ angacāimpa. Tōmengā wade nānō wææ angaiñō āninque, Mīni waa quēwenguinque cæcæmīnimpa, ante apænedāmaī ingaingā inte ñōwo iine ante wææ āninque, Mīni waa quēwenguinque cæcæmīnimpa, ante mā apænegacāimpa. ³Edæ iine ante wææ āninque tōmengā, “Mǎnōmaī cæmīni ininque mīnitō watapæ quēwēninque iimæca wantæpiyæ quēwencæmīnimpa,” ante mā apænegacāimpa.

⁴Wæmpomīni guiquēnē ēñēedāni. Mīnitō wēnāni wīī āināni bacædānimpa, ante wææ cædinque mīnitō tōmēnāni inānite piinte cædāmaī iedāni. Wæætē, Mōnō Awēnē wææ aadinque mōnō imonte pāninque odōmonte apænecampa, ante adinque mīnitō tōmengā nānō cæī baī adobaī cædinque wēñænāni inānite ædæmō wææ aadinque mōnō Awēnē nānō apænedō ante odōmonte apænemīni ate tōmēnāni waa pæcædānimpa.

⁵Waadāni mīnitō imīnite ò ænāni inte tōmēnāni beyænque cæte nē quēwēmīni iñōmīnite apænebo ēñēedāni. Iimæca mīnitō awēnēidi inānite mīnitō waa adinque guīñente wædinque tōmēnāni nāni ānō ante ēñente cæedāni. Mīnitō Codito angā ēñente mīmōnē nō pōnente cæmīnitawo. Ininque edæ iimæca awēnē angā ēñente edæ adobaī mīmōnē nō pōnente cæedāni. ⁶Mīnitō edæ, Awēnē botō imote waa acæcāimpa, ante tōmengā ayongante ēñente cæmīnitawo. Iñæmpa awēnē dæ goyongante adobaī cōwē ēñente cæedāni. Codito botō imote nē godonte Ængaingā ingante nē cæte quēwēmō imoppa, ante pōnēninque

mīnitō edæ Wængonguī nānō ānōnō ante mīmōnoque pōnente cæedāni.

⁷Mīnitō mīmōno piyænē cædinque iīmaī ante pōnente cæedāni. Iimæca awēnē ingante cædinque botō wīī waocā beyænque ante cæbopa. Wæætē Wængonguī Awēnē beyænque ante botō iimæca awēnē ingante cæbopa, ante pōnēninque pæ piñænte baī cæedāni. ⁸Mīnitō iīmaī ante edæ do ēñēmīnipa. Mīnitō wacā nānō ò ænimīni inte tōmengā beyænque nē cæte quēwēmīni incæ abæ tawænte ee gote baī nāmā beyænque cæte quēwēmīni incæ mīnitō imīnite mōnō Awēnē iñōmō, Bitō ægancadō waa cæbii, ante adinque wæætē eyepæ pōnī pædæ pōnongā ænguimīni imīnipa.

⁹Waocā ingante nē ò æmīni guiquēnē ēñēedāni. Mīni nē ò ængaiñāni inānite adobaī waa cæedāni. Tōmēmīni Awēnē incæ tōmēnāni Awēnē adocā inongā inte oōnædē owocampa cæmīni. Tōmengā iñōmō wacā ingante wadō wacā ingante wadō ate pōnente cædāmaī ingampa. Mǎnōmaīnō ante do ēñēmīni inte mīnitō beyænque cæte nē quēwēnāni inānite edæ piinte āninque edæ pæmēnēnāmaī iedāni.

Tæinta wēñate baī mōnō tæī piñænte ewocacæimpa

¹⁰Ñōwo iīmaī yewæmōninque botō idæwaa yewæmōmopa. Mīnitō mōnō Awēnē nempo nē quēwēnōmīni iñōmīnite tōmengā nānō tæī piñænō pædæ pōnongā āninque tæī piñænte entawente quēwēedāni. ¹¹Mīnitō wææ caaquincoo, ante Wængonguī eyepæ pōnī nānō da pōnōnincoo tōmancoo āninque wēñate baī cædinque tæī ongōedāni. Edæ mānincoo tōmancoo wēñate ongōñōmīni wēnæ awēnē, Oda cæcæmīnimpa, ante nanguī ēñente cæcā incæte mīnitō wæætē oda cædāmaī inte edæ tæī ongoncæmīnimpa.

¹²Edæ wīī waodāni inānite mōnō guēadō guæa cæcæimpa. Wæætē wēnæidi awēnēidi tōnō wēnæidi inānite nē ānāni iñōnānite mōnō tōmēnāni

inānite wæætē guēadō guēa cæcæimpa. Inguipoga wēmō iñōmō tæi piñænte enempodāni tōnō oönædē iñōmō wēnæcoo nē wiwa ēwocate cædāni tōnō mānimpodāni māmō ti gotodoncæ cæyōnānite mōnō wæætē guēadō guēa cæcæimpa. ¹³Īnque tōmēnāni piñte māmō nāni wiwa cæōnæ iñque bayonte mōnō wodii winōnāmai inte tōmēnāni inānite wæætē da godongæimpa. Ante ayæ, Tōmāā edæ eyepæ cæte ate mōnō edæ tæ go wæænāmai inte adiyæ ongongæimpa, ante cædinque mīnitō Wængonguī nānō, Wææ caquincoo, ante tæinta bai nānō da pōnōincoo edæ do eyepæ æninque tōmancoo edæ da wēnaedāni.

¹⁴Wēnadinque edæ wodii winōnāmai inte edæ næ gongænte tæi ongōedāni. Edæ, Tæi wææ caquincoo, ante pōnō tæi pacadeyænte bai cædinque mīnitō Wængonguī nānō nō pōnēnō entawēninque adobai nō entawente quēwēedāni. Tæcætawē iñō tæiñeta mīni wææ wodontawēinta ante wēñate bai cædinque Wængonguī tæiyæ waēmō nānō cædō ante edæ entawente tæi cæte ongōedāni. ¹⁵Mōnō Codito pōnō cæcā beyænque mōnō godongāmæ piyænē cæcæimpa, ante watapæ mōnō ēñēnō beyæ pogodo gote apæneceate ante cædinque mīnitō awæncata tæi wææ cæwainta wēwate bai cædinque gānē pōnente cæedāni.

¹⁶Yabæque pōni wææ cæquinta tæinta bai næænte bai cædinque mīni wede pōnēnō ædæmō entawēninque quēwēedāni. Īnque nē wiwa cædongā ponte gonga encado bai to piyæncate bai cædinque, Mīnitō oda cæcæmīnimpa, ante cæcā ate mīnitō mīni wede pōnēnō beyænque tōmengā wiwa nānō ānō ante edæ ēñēnāmai incæmīnimpa. ¹⁷Ayæ, Ocamō incainta tæinta bai impa, ante wææ wencate bai cædinque mīnitō Codito pōnō ængā beyænque mīni quēwenguinō ante ænte entawencæmīnimpa. Mīnitō yaēmē wææ næænte bai cædinque Wængonguī Ōnōwoca apæneceā ēñēninque nāni

yewæmongainta ate ædæmō ēñēninque edæ cōwē entawēedāni.

¹⁸Ayæ Wængonguī Ōnōwoca ingante ēwocadinque mīnitō tōmengā ingante, Wængonguī bitō cōwē cæcæbiimpa, ante godōmenque nanguī apænedinque ñine cædāmai iedāni. Mānōmai cæcæte ante mīnitō mīmīni ongōninque wæntæte badāmai inte Wængonguī quināni tōmānāni beyæ ante cōwē apæneedāni. ¹⁹Ayæ botō beyæ ante adobai apænemīni ēñēninque Wængonguī pōnō cæcā ate botō edonque tedecæboimpa, āmopa. Edæ Codito ingantedō ante wēñēñedē mōnō ēñēnāmai ingaine ante botō ñōwo watapæ ēñēninque guiñēnedāmai inte apænebo ēñencædānimpa, āmopa. Mānōmainō ante mīnitō Wængonguī ingante apæneedāni, āmopa. ²⁰Māñine ante botō wadāni weca nē gote apænebo beyænque ñōwo gæguincamē encaipobo inte wæbopa. Īnque, Māñine ante nē apænequēngā inte Pabodo cōwē guiñēnedāmai inte apænececæimpa, ante mīnitō botō beyæ ante apæneedāni.

Waa quēwencæmīnimpa, ante

²¹Botō Pabodo iñōmō æbānō quēwēmoo, ante, Quinō bai cæboo, ante ēñencæte ante wæmīnitawo. Edæ Tiquico mōnō tōñiñacā mōnō nē waadecā inongā inte tōmengā ñōwo pōninque mīnitō imīnite māñinō tōmānō ante apæneceā ēñencæmīnimpa. Tōmengā iñōmō mōnō Awēñē nempo quēwēninque tōmengā beyæ nē cædongā inte cōwē nē pōnengā inte ædæmō cæcā acæimpa. ²²Īnque, Pabodoidi æbānō quēwēnāni, ante tōmengā pōnō apæneceā ēñēninque mīnitō wampo pōnēninque tæi piñænte entawencæmīnimpa. Ante cædinque botō, Ædæmō apænebi ēñencædānimpa, ante tōmengā ingante mīnitō weca da godōmo pongā aedāni.

²³Mæmpo Wængonguī tōnō mōnō Awēñē Itota Codito mīnitō imīnite waadete pōnō cæda ate mīnitō mīni caipæ incæ gānē entawēninque wede pōnēninque godongāmæ edæ

waadete pönencæminimpa, ämopa.
²⁴Æcänö mönö Awënë Itota Codito
 ingante cöwë waadete pönente
 ñimpo cädämaï ina iñömö tömengä

ingante Wængonguï pönö waadete
 cæcæcäimpa, ante botö Wængonguï
 ingante apänebopa. Mäninque ante
 yewämömopa.